

50 Joor Jungi Garde

50 Joor Jungi Garde, d'Zyt goot gschwind verby
 Vo minere Syte dr rächt Momänt fiir Noschtalgy
 E Jubileum wo sich ganz gross feschte loot
 In dr Hoffnig dass es no 50 Joor so wyters goot

Ich waiss no wieni plangt ha, und ha miesse warte
 Uff mi erschti Fasnacht mit dr Junge Garde.
 Mit Elfi denn dr erschti Zeedel gschrybe
 Ich wär gärn für allewyle bi de Junge blybe.

Noch däre lange Zyt isch dr Momänt
 Fyr e neyi Dichtere für die Junge Bängg.
 Drum schryb-y no die Värslü doo
 Denn pagg-y zämme und ka goo.

Dur die Zeedel ziet sich als roote Fade
 Jetzt scho ai Joor me als e Dekade
 E Froog noch em Sinn, em wie und em woane
 Dr Bligg uff Problem wo sich mege abane.

Vo jedere Medallie gitts zwai Syte
 S hett nit nur aine Rächt, wenn zwai sich stritte.
 Nämed's nit z'ärnscht, nit mit z'vyl Humor
 Hinder baidem steggt e grossi Gfoor

Und d'Frooge wo die Junge umtrybe
 Sinn doch allewyl die gliche blybe.
 Wie: Wird's jetzt dunggel? Gits no Stroom?
 Hets no Wasser? Hebt im AKW s'Atoom?

Hesch du au Angscht vor däre Grippe?
 Bisch au verwirrt, will vyli stritte?
 Het mes jetzt luschtig, aifach soo,
 Egal wär derby kennt z'Schade koo?

Wie waiss me bi däm ganze Agebott
 No wirkligg sicher, was me wott?
 Yberall muess me Prioritäre setze,
 Scho Jungi mien hit umehetze.

Isch d'Ample grien oder rot oder isch's egal?
 Kumi unter s'Tram, s'Auto oder s'Velopedal?
 Wieso legt d'Gesellschaft nur Wärt uff Schnälligkait?
 Uff Ellbeegle, nimm uff Gselligkait?

Muess d'Natur uns jede Daag konkrete Nutze bringe?
 Sotte mir sie nit gniesse, um ihri Erhaltig ringe?
 Miemer immer mit em Flugli in d'Ferie fliege?
 Miemer immer s'Neyschte vom Neye sofort kriege?

Wär isch d'Schuld, wär isch am Beschte?
 Döörf me yberhaupt no feschte?
 Wie söll-y wüsse, mach-ich's richtig?
 Wie söll-y wüsse, was isch wichtig?

Sotte mir nit per sofort brobiere
 E ney Gmainschaftsgföhl z'kreiere?
 Vom Ärnscht zum Schöne hämmer immer gfunde
 In de jörlig allerbeschte zwaiesibzig Schtunde

Und nyt isch besser, wenns ums Schööne goot
 Als dr Momänt, wenns am Morge vieri schloot
 D'Vorfrayd, die gspyrsh an Ärm und Bai
 Merggsch, du föhlsch di nümm ellai

In de Rootsheere in dr Junge Garde
 Wenn alli mit Piccolo d'oobe warte.
 Die ganz Stadt hebt kurz dr Schnuuf
 Und di Härz und Seel, si göhn dr uff

Denn s'Liecht goot ab, s'foot afo pfyffe
 Si isch widdr doo, kasch's kum begryffe
 Derfsch di lo trybe, d Frau Fasnacht isch ändligg koo
 Kasch in de Junge gschützt dur d'Gasse goo.

An dr Fasnacht gitt's kai ich me, s'gitt nur e mir
 In alle Junge brennt denn s'Fasnachtsfyr
 D'Larve hämer vo Hand kaschiert
 Und unseri Goschdym grad sälber no verziert

In de Junge diemer kain usschliesse
 Zyt verdopplet sich, wemer si zämme gniesse
 D Latärne hämer sälber gmoolt
 Blagedde mit grosser Vorfrayd zämme gholt.

Mir heere vo wytem Drummle und Piccolo
 Fröölüg und farbig sin Ueli, Waggis und Pierrot
 E jede uffem Wäg zum Cortège, du und ich
 Und plötzligg föle und simmer alli glych.

D'Fasnacht kame nit guet beschrybe oder konserviere
 Muesch si sälber lääbe, s'Gföhl go ussbrobiere
 D Frau Fasnacht nimmt au dy gärn mit
 Ihre Zauber isch ain, wos sunscht nit gitt

Do gniessisch die ganz bsunderbari Luft
 Mit em Orangsche, Mimöösli und Röppli Duft.
 Loss es zue, loss di druff y,
 do chasch als Mensch e Mensch no sy.

www.rootsheere.ch

Am Fritig und Samschtig, 3. und 4. Merze, dien sich die Junge
 Garde uff em Barfi vorstelle und hoffe uff vyyl Bsuecher und
 Jungi, wo Inträssi hän. (Fr 13.00–17.00 Uhr, Sa 11.00–16.30 Uhr)



Wotsch bi uns mitmache? Denn kumm doch ans Yyschriibe. Du findsch uns am
 Samschtig, 11. Merze 2023, vom Zwei bis am Vieri uf em Barfi. Mir freye-n-is uf di!

D Ladäärne-Uusstellig uff em Minschterplatz und d Waage- und Reggwisyte-
 Uusstellig bi dr Kasäärne sin vom Määntig znacht bis am Mittwoch demoorge!

Drugg: blo.ch, Arlesheim